

ISUA JUBILEE
Leviticus 25:1-46
QYQHỌ UKPEP-ŃKPỌ 89
Eke Ikpọ Owo

IKỌ IBUOT: “Spirit Ọbọñ Jehovah odoro mi: koro, Jehovah emeyet mi aran onim, man mbuk eti mbuk nnọ mbon nsuk-esit; ọmọdọñ mi, ete mbọp mmọ eke esit mmọ ọbuñode, ñkwọrọ uwọrọ-ufin nnọ mbuot ekọñ, ñkwọrọ, nsana-nyak nnọ mmọ eke ekọbide” (Isaiah 61:1).

I Mme Item Emi Etode Obot Sinai

1. Jehovah ọdọhọ Moses ke Obot Sinai ete yak enye onim isua kiet ọnọ Sabbath ke ini mmọ edidukde isọñ emi Enye edinode mmọ, Leviticus 25:1, 2
2. Mmọ enyene ndida isua itio kiet ntọ ñkpọ nnyuñ ndọk Leviticus 25:3; Exodus 23:10
3. Qyọhọ isua itiaba enyene ndidi isua nduok-odudu, emi edide Sabbath Jehovah, Leviticus 25:4; Mme Hebrew 4:9
4. Mmọ ye Isen owo eke eduñde ke isọñ oro enyene ndidia se itibede ke idem esie, Leviticus 25:5-7; 2 Ndidem 19:29

II Qyọhọ Isua Aba Ye Duop

5. Mmọ enyene ndibat isua Sabbath ikatiaba mme isua 49, Leviticus 25:8
6. Ukorowo Jubilee enyene ndisioro uyo ke Usen Usio-Isop ke kpukpru obio, Leviticus 25:9
7. Qyọhọ isua aba ye duop enyene ndidi isua Jubilee mme uwọrọ ufin. Ekpọñ kpukpru se owo ekenyenede emi ekenyamde enọ enye, Leviticus 25:10-13; Isaiah 61:1, 2; 63:4; Luke 4:19
8. Edieke mmọ ekedepde mme enyamde inyene mmọ, ekenyene ndibi ere ekọm-urua etiene ibat isua emi ebede tọñ nte Jubilee ekebe, Leviticus 25:14-16; 27:17-25
9. Mmọ inyeneke ndifik kiet eken, edi enyene ndibak Abasi, Leviticus 25:17-19

III Uwak Mbuñwum

10. Edieke mmọ ebupde se mmọ edidiade ke qyọhọ isua itiaba, Jehovah ọdọhọ mmọ ete ke Imọ iyediọñ mbuñwum mmọ ke qyọhọ isua itio kiet, inyuñ inam mmọ eñwum mfri se ikemde ke isua ita, Leviticus 25:20, 21
11. Mmọ enyene nditọ ñkpọ ke qyọhọ isua itiaita, ndien enyuñ edia akani mbuñwum tutu osim qyọhọ isua usukkiet, Leviticus 25:22; Joshua 5:11, 12

IV Edifak Isọñ

12. Inaha nte enyam isọñ tak-tak, koro isọñ enyenede Abasi, Leviticus 25:23, 24
13. Edieke eyamde oto ke ntak unana, oruk esie enyene ndifak isọñ oro mbemiso isua Jubilee, edi edieke mikemeke ndifak enyene ndikpọñ nnọ andinyene enye ke isua Jubilee, Leviticus 25:25-28
14. Enim mbet emi ọbọpde erinyam mme ufok ke obio ibibene ye mme obio emi ibibene miduhe ye mmọ emi mme Levites enyenede, Leviticus 25:29-34
15. Mmọ inyeneke ndibọ akwa udori nto eyen-eka, mme ndinam enye edi owo mkpọkọbi, Leviticus 25:35-42; I Ñwed Corinth 7:23
16. Mmọ inyeneke ndikara enye ke nsọñido, Leviticus 25:43-46; Ñwed Mbon Ephesus 6:9; Ñwed Mbon Colossae 4:1

SE EKPEPDE EBAÑA

Isua Jubilee - Mbiet Ñkpọ

Isua Jubilee ebiet ini mfọn Gospel emi kpukpru mmọ emi enimde Christ ke akpanikọ ebọhọde ufin idiok-ñkpọ, ndien enyuñ enọ mmọ unen adia-akpa ke otu mmọ emi enamde esana ke Christ Jesus. Ekedi isua uwọrọ ufin ke isọñ ye ediom emi ebọpde ifin iren ye iban, ye isọñ ye inyene emi mme ekpuk ye oruk mmọ ekenyamde.

Mmọ ekenyene nditọ mkpasip nnyuñ ndok mbuñwum mmọ ke isua itio kiet, edi ke qyọhọ isua itiaba mmọ ikenyeneke nditọ mme ndidok idok. Jehovah ekenyene ndidọñ edidiọñ Esie nnọ mbuñwum mmọ ke qyọhọ isua itio kiet, ndien iñwañ mmọ ekenyene ndiñwum mfri nte edikemde ke isua ita. Oro ikpọñ ekedi utibe ñkpọ, ndien edi Abasi ikpọñ ekekeme ndinam oruk eñwọñ eke etiede ntem.

Qyọhọ isua itiaba ekenyene ndidi isua nduok odudu, Sabbath Jehovah. Mmọ ye isọñ mmọ, ye ufene mmọ, ekenyene ndinyene isua nduok odudu. Ke ini mmọ ema ekenam usọrọ isua Sabbath ikatiaba, emi edide isua 49, mmọ ekenyene ndinyene saña-saña Sabbath. Qyọhọ isua aba ye duop ekenyene ndidi Isua Jubilee, emi ebiate kpukpru mme isọñ ndien efiak eyak se ikenyenede owo enọ andinyene.

Mbet Ndinọ Kpukpru Owo Unen Ukem-Ukem

Emi edi mbet emi ọfonde akan ke otu kpukpru mbet emi enode man ọbọp ete-utom ye mme anam-utom. Ifet ikeduhe inọ enyene ñkpọ owo ndifik ubuene, ndien ifet ikenyuñ iduhe inọ ubuene nditie ifu. Mmọ ekenyene ndidi ukem-ukem nte nditọ ete. Edieke etimde enim mbet emi, eyenam owo ndidi ukem ye kiet eken ọsọñ ada.

Edi akpanikọ ete ke ntak mbet emi ekedi ndikpan enyene nkpo owo ndifik mme ubuene nnyuñ nnam mmọ ekabare edi ifin, nnyuñ mbiọñ ibat-ibat owo ndida isọñ nnyene.

Zedekiah

Ke eyo Jeremiah, ke ini edidem ke Babylon akañwanade ekọñ ye Zedekiah edidem Judah, Zedekiah ama anam ediomi ye kpukpru owo ke Jerusalem ndikwọrọ uwọrọ-ufin nnọ mmọ; ete kpukpru owo kiet kiet ayak ifin mmọ ewọrọ ke ufin (Jeremiah 34:8, 9). Mmọ ema enyime, enyuñ ayak ifin mmọ enyọñ. Edi ke ini oro ebete, mmọ ema enam ifin mmọ efiak enyọñ edidu ke idak ukara mmọ. Emi ama ayat Abasi esit koro mmọ ema ebiat ediomi emi, ndien Jehovah etiñ ebe ke Jeremiah ete, “Sese, Jehovah ọdọhọ, ete, Ami mmọñ nkwrọ uwọrọ ufin nnọ mbufo, nnọ ofut ye idiok udọñ ye biọñ; nyenyuñ nda mbufo nnọ man edi se etukde ke kpukpru mme idut ererimbot” (Jeremiah 34:17).

Jehovah ama ọdọhọ mmọ ke akpa eritọñ ete, edieke mmọ midikopke mme ewuhọ Esie, Enye eyesuan mmọ ọdọñ ke idut mme okpono ndem onyuñ anam isọñ mmọ akabare edi ndon. “Ndien isọñ eyedia mme Sabbath esie, ke ofuri ini emi enye etiede ke ndobo, mbufo enyuñ edude ke isọñ mme asua mbufo; enye eyenim Sabbath ke ofuri ini emi enye etiede ke ndobo; koro enye mikoduokke odudu ke mme Sabbath mbufo, ke adañemi mbufo eduñde ke esit” Leviticus 26:34, 35).

Jehovah ama ayak etañ Nditọ Israel ke ifin eduk ke isọñ Babylon onyuñ ayak mmọ edu do ke isua ata ye duop tutu isọñ adia mme Sabbath esie (2 Chronicles 36:21).

Ufak Emi Otode Christ

Nnyin ikedi ifin satan; nnyin ima inyam idem nnyin inọ ikpikpu nkpo; nnyin ima isin unen nnyin ndika heaven ye nsinsi ubọñ esie. Edi, “ke adañemi nnyin ikodude kaña ke mmem idem, ke edikem ini Christ akpa” ọnọ nnyin mmọ emi miteñeke Abasi, onyuñ afak nnyin oto ke ọsọñ urua Iyip Esie, ndien onyuñ ọnọ nnyin udeme nnyin, emi mibiarake, minyuñ ikemeke ndibe mfep.

Edisana Luke ewet abaña kiet ke otu akpa ukwọrọ-ikọ Christ: “Ndien ke enye ọkibọrede ñwed, okut itie emi ewetde ete, Spirit Jehovah odorọ Mi ke idem, Koro Enye emeyet Mi aran onim ete, nkwrọ eti mbuk nnọ nditọ-ubuene: Enye ọmọdọñ Mi, ete, nkwrọ uwọrọ ufin nnọ mbufo-ekọñ, nnyuñ nkwrọ erikut usuñ nnọ mme nnan, Nnyuñ nsana mmọ emi efikde nnyak, Nnyuñ nkwrọ isua mfọnido Jehovah. Ndien Enye okibi ñwed, ayak ọnọ asañutom, onyuñ ọsuhọre etetie: kpukpru mmọ emi edude ke synagogue enyuñ ewuk enyin ese Enye. Enye ọtọñ ndidọhọ mmọ, ete, Ikọ ñwed Abasi emi omosu ke utọñ mbufo mfin emi” (Luke 4:17-21). Ata Isua Jubilee ama edi. Ini uwọrọ-ufin emi ekenimde eno kpukpru ukpọñ emi idiok-ñkpọ ọbọpde. Ekeme ndifiak mbọ itie emi ekọduokde oto ke Adam ebe ke Jesus Christ. Ke akpanikọ isua emi Abasi onyime emedi!

Usen Usio-Isop

Jesus ekenyene ndikpa ke ibuo idiok-ñkpọ ofuri owo man enam mmọ ewọrọ ufin. Akwa ubọhọ mme uwọrọ ufin idiok-ñkpọ, emi ewetde ke Ikọ Abasi ọkọwọrọ osu ke ini Akwa Ufak, emi ediwa Ọbọñ Jesus akadade itie.

Ekeda ufri obukpọñ enam ediọñ isua Jubilee. Ke ema ekenam kpukpru nkpo ema, Jesus etiñ abaña Idem Esie, ete, “Enye eyesio mme angel Esie ọdọñ ye akwa uyom ukorowo, mmọ eyenyuñ etañ ndimek ikọt Esie ke ikpehe ofim mbinañ ebon ọtọ kiet, ọtọñde ke utit heaven kiet tutu osim eken” (Matthew 24:31).

Ini oro akwa Sabbath nduok odudu eke Abasi eyedi, emi edide ediye Jubilee eke tọsin isua emem. Andiwet Ñwed Mme Hebrew etiñ ọnọ nnyin ete, “Mmọdo nduok odudu Sabbath ọsuhọ ọnọ ikọt Abasi,” onyuñ oduri nnyin utọñ mbak owo nnyin kiet ekededi oku-nyene idiok esit unana edinim ke akpanikọ emi edinamde nnyin idianade ikpọñ odu uwem Abasi.

MME MBUME

1. Nso ke isua Jubilee ada ọnọ?
2. Nam añaña, ntak emi mbet Abasi edide ukem-ukem.
3. Nso idi ntak emi Jehovah ọkọdiọñde mme mbuñwum mmọ ke ọyọhọ isua itiokiet?
4. Nte ema ayak Nditọ Israel eda nditọ ete mmọ ekama nte mbon ifin?
5. Edieke ekenyamde se owo ekenyenede, nso ini ke ekenyene ndifak enye?
6. Nte isen owo ema enyene unen ndifak se owo efen ekenyenede?
7. Enyaña nnyin eto ke Anie?
8. Ini ewe edi isua mfọn-ido eke Jehovah?
9. Nso ini ke afo ekere ete ke akwa isua Jubilee edida itie?